

Kerajaan dicadang mansuh cukai jalan motosikal

M 10 SEP 2003

KUALA LUMPUR 9 Sept.
— Pergerakan Pemuda UMNO hari ini mencadangkan supaya kerajaan memansuhkan bayaran cukai jalan untuk motosikal berkuasa rendah dalam Bajet 2004 bagi meringankan beban golongan berpendapatan rendah.

Exco Pemuda UMNO, Mohamad Norza Zakaria berkata, sekiranya cadangan itu diluluskan, ia merupakan satu insentif kerajaan kepada golongan tersebut yang sebahagian besarnya terdiri daripada pekerja kategori buruh, petani dan nelayan.

Beliau menjelaskan, kebanyakan golongan berpendapatan rendah menjadikan motosikal berkuasa rendah sebagai pengangkutan utama mereka untuk mencari rezeki.

Penghapusan cukai jalan, katanya, akan membantu golongan itu mendapat lebih pendapatan yang mana dapat disalurkan ke sektor-sektor lain termasuk peruncitan, pelancongan dan perumahan.

“Golongan berpendapatan rendah boleh menggunakan lebih pendapatan itu untuk meningkatkan taraf hidup keluarga.

“Mungkin mereka boleh menggunakan wang tersebut untuk membawa keluarga melancong atau membayar deposit untuk membeli rumah,” katanya di sini, hari ini.

Perdana Menteri yang juga Menteri Kewangan, Datuk Seri Dr. Mahathir Mohamad akan membentangkan Bajet 2004 pada 12 September ini.